

Date – 22/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh hun chu naktuk ah a tawp ang.
2. Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avanga naktuk atanga tlanloh an tum chu kaltlang pui an tum.
3. Delhi Assembly inthlan campaign chuan a vanglai a thlengchho mek.
4. Prime Minsiter Narendra Modia chuan Beti Bachao Beti Padhao chu nunphung siam danglam a,mipuite theihna hmanga hmalakna ropui tak a nih thu a sawi.

<><><>

VC/LC ELECTION NOMINATION

Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh hun chu naktuk chawhnu dar 3 ah khar a ni tawh dawn a,

Hming pekluh te hi naktip chawhma dar 11 atanga endik tan a ni anga, inhnukdawd duh te tan karleh thawhtanni chawhnu dar 3 thleng hun hawn a ni ang.

Aizawl, Lunglei, Champhai, Serchhip, Mamit, Kolasib, Saitual, Khawzawl leh Hnahthial District bakah Aizawl Municipal Corporation leh Lunglei Municipal Council huamchhunga Local Council-ah te thla thar ni 12 ah inthlan neih a ni anga, vote hi chhiar nghal a ni ang.

Local Council leh Village Council inthlanna atan hian political party te nasa takin an inbuatsaih mek a, district thenkhatah chuan candidate te an puang tawh a ni.

Thenzawl Vantawng Group YMA Hall ah ZPM Thenzawl Block huam chhunga VC Candidate tur puanna hun ah thusawiin bialtu, Chief Minister Pu Lalduhoma chuan Kalphung thar Mipui Sorkarin rorelnaa Pathian ram a thlen

theih nan leh Sorkar hmalaknain mipui tana hmasawna tluantling a thlen theih nan Sorkar lai thawhpui thei tur LC/ VC a mamawh a ti a.

LC/VC te chu Sorkar kut leh ke pawimawh tak an ni a, LC/VC tha nei veng leh khua chuan hmasawna tam tak an khawtlang tan an chawlut thin a, chutih laiin Opposition LC/VC te zingah sorkar thawhpui hleitheilo an awm chuan, Sorkar hmalaknain mipui a thleng zo lo fo thin a ni a ti. ZPM Party chuan hmasawna hna a thawh tak tak dawnin Sorkar lai thawhpui thei LC/VC an pawimawh zia a takin an tawng chho mek a ti.

Mizo National Front (MNF) Serchhip Block 'E' ten Serchhip khawpui chhung VC Area hrang hranga MNF Party aiawh a VC Candidate tur te waviin khan puangin, he hun hmanpuitu MNF Gen Hq Secy Pu J. Malsawmzuala Vanchhawng chuan, VC leh LC te term dinglai ZPM sorkarin thla 6 chuang zeta pawt tawi a, Dan kalh a a hun hmaa inthlanna a buatsaih lui tur chu mipui rorelna (Democracy) kalphung zah lohna leh pawngsualna nasa tak a ni a ti a,

Ngaihndan inang lote inpawm tawn thiamna chu Democracy chakna leh ropuina anih laia ZPM sorkarin 'Party Bil Sorkar' din a tumna langsar tak chu an vote hmanga dodal turin mipuite a sawm a, Kumin VC Election-ah hian Education Dept. hnuaia zirtirtute chu a buai ber tur annih dawn thu leh inthlan hun tur hi pawl 10 exam dawn tep lai a ni a, zirlaite tana boruak dang siam hun loh lai taka VC inthlanna buatsaih luih a ni tur chu ZPM sorkarin zirlaite leh zirtirtute a ngaihthah zia ti chiangtu a ni a ti a, Ration Buhfai khulna man ZPM sorkarin a leta a ti sang thut mai chu mipuite dinhmun zirchiang hmasa si lova sorkarin a thuneihna a hman khumna lungchhiatthlak tak a nih thute, buhfai Grade A supply tur anga sawi a nih laia tun thlenga buhfai ngai reng sem chhunzawm reng ala nih thute, a tira sawi rik miah lo 'Card Sen' siam belh hnuhnawh leh a ni chu ZPM sorkarin zirchianna mumal nei a neih hmasak loh vang anih thu a sawi bawk.

<><><>

TRUCK OWNER

Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avanga naktuk atanga tlanloh an tum chu kaltlang pui an tum a.

Mizoram Truck Owners Association Secy Pu Dina Tlau hnen atanga thudawn danin, naktuk zing dar 7 ah MTOA Site Office Rangvamualah an tan anga, hemi hunah hian Kolasib leh Kawnpuih an tan ve nghal dawn a ni.

Pawl 2 te hnuaiah hian truck 600 vel an in register anga chhinchhiah a ni a, Mizoram Supply Dept leh FCI buhfai phurh chui an hnapui ber a ni a, anni bakah hian Mizoram Tipper Association leh Kolasib District Tipper Assn te, Kolasib Dist chhunga truck driver leh Owner Jt Action Committee, leh Kawnpui Town Truck Driver Assn ten pawl 2 te hmalakna hi thlawpin tlan loh an tum ve bawk a, anmahni hmun theuhah an duty dawn niin a sawi.

Pu Dina Tlau chuan kan corr zawhna chhangin, tun tuma truck a din avang hian Insakna bungrua, Balu, Itta leh cement te phurh a ni dawn lova, Cachar Lam Truck neitu pawl te an din dawn bawk avangin Mizoram chakkhai nitin mamawh phurh luh a ni dawn lo bawk a ni. Kawng hi zawh tlaka an siam hma chuan an tlan lovang tih sawiin nikum kum tawp atang khan kawngchhia avang hian an buai tawh a, sorkar nen an inbiak hnuah ruah han hnuah siam tur an ti a, an ngaichan fe hnuah a thal vaekchar a ni tawh a kutthlak a awm loh bawk avangin an tan tlan ngam a ni tawh lo a ti bawk.

Hetihlai hian, All Mizoram Petroleum Dealers Association (AMPEDA) hruaitute chuan truck intelkhawm tlan tumlo mahse an tlan dawn an ti a,

Supply Department atanga thudawn danin, Mizoramah January thla daih buhfai khawl sa an nei a, furpui huna dah that atan stock kalpui leh mek anih avangin a phurtu truck an din rei chuan an tuar phah thei a ni.

<><><>

KOLASIB

National Highway kawngpui siam mek chungchangah chak zawka hmalak a nih theih nan hmalak dan tur thlirin vawiin khan Kolasib DC Pu Robert C. Lalhmangaiha hovin a pisa ah meeting a ni a.

He thutkhawmna ah hian National Highway 306 Kolasib to Kawnpui inkar kawng siam meka hmalakna kal mek sawiin Kolasib DC chuan he lai kawng siamtu NHIDCL hnuaiia Balaji Construction-te chu ruahmanna awm tawh ang ngeiin Kolasib to Kawnpui kawngpui siam Black Topping hi kumin March ni 31 a zo fel hman turin a chah a. Fur khaw chhiat hma ngeia kawngpui siam hna hi zawhfel a nih loh chuan mipuite bakah a kawng siamtu Company-te tan pawn harsatna lian zawk a awm thei dawn tih a hrilh a. DC chuan National Highway 306 chu Mizoram luhka pawimawh tak a nih angin Kolasib mipui mai ni lo Mizoram pum mipuite tan nitin mamawh chawkluhna kawng pawimawh tak a ni a, chumi chu hrereng chungka kawng siam hna hi chak zawka thawh a pawimawh thu sawiin, Balaji Company-te chu thawktu leh hmanrua pawh lakbelh turin a chah nghal bawk.

He thutkhawmna ah hian Kolasib to Kawnpui Highway kawngpui siam mekah inzawmkhawm pawl thenkhatte'n lungawi lohna an thlen te chu ngaihtuah ho a ni bawk a. DC Kolasib chuan he kawngpui siam mekah hian mipuite chu a siamtute tan harsatna siamsak lo turin chah a, kawngpui tha tak siam a nih theih nan Sawrkar leh a siamtute chuan an theihtawp an chhuah a ni tih hria a, zaidawh taka awm turin a chaha. Pawl anga lungawi lohna lan tirna a awm pawn mipui leh khawtlang nunphung tibuai lo zawnga tih lan ni thei se tiin a ngen a. National Highway dangchat zawnga hmalakna emaw mipui nunphung tibuai zawnga hmalakna awm lo se a duh thu a sawi bawk a ni.

He hunah hian Kolasib Superintendent of Police Pu David H Lalthangliana pawhin thusawiin kawng siam hna chak leh tha taka kalpui a nih theih nan lirthei kal dan vilpui turin leh a tul anga tanpui turin Kolasib SP Office chu an in peih reng thu a sawi bawk.

He thutkhawmna ah hian Kolasib DLh SP bakah Kolasib Addl. DC, NHIDCL leh Balaji Construction-a thawktute, Mizoram PWD lama thawktute,

Sub-Hqrs YMA leh Joint Action Committee Mizoram Truck Owners Association aiawhte an tel thei a ni.

<><><>

MNF

MNF Party chuan vawiin khan thuchhuah siamin, sorkar chu a rang thei ang bera kawng chhiate siamtha thuai turin an phut tih an sawi a.

Mizoram ei leh bar chawkluhna kawngpui ber Vairengte leh Sairang inkar kawng chhia avanga lirthei pawl thenkhat an tlan ngamlo chu pawl an ti tih sawiin, PWD Minister berin kawng siamna tura pawisa awm thu a sawi a, ruahtui tlak loh hnu leh khaw that hun pawha he lai kawng hi siamthat a tum si lo chu a lungchhiatthlak a ni an ti a, nimin piah atang chauha kawng siamtha tura Mizoram PWD-in hma a la tan ve chauh chu MNF chuan sorkar inthlahdah lutuk avanga che tlaiah a puh a ni.

PWD Minister chu chak taka hma la a, kawng chhe laite siamtha nghal zung zung turin an phut tih an sawi a, Kawng siamna tura tuialhthei man uchuak taka chhiah an tihpunna sum tlingkhawm pawh a hmanna tur dik tak, Truck tlan ngamna tura kawng siamthat nana hmang nghal turin Chief Minister Pu Lalduhoma kaihruai sorkar an ngen a. An insawi ang ngeia mahni inhaivur hmasa lova ram tan hnathawk hmasa turin an chah nghal tih an sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

REFUGEES

Vawiin khan tlawmngai pawl Cod Nerc, Mizoram leh Impulse NGO Network, Shillong te chuan Minister of State Pu B. Lalchhanzova pisa – ah himna zawnga Mizorama rawn raltlante chhawmdawlina kawnga an hnathawhte thlirletna hun an hmang.

State Team Lead Impulse NGO Netowrk leh Cod Nerc Chairman Pu C. Lalmuanthanga chuan Raltlan chungkua mi 500 hnenah thla 6 chhungin ration pek niin kum 2023 July thla khan Champhai Disatrick tan damdawiin khum 100 leh damdawiin mamawh hrang hrang CMO, Champhai ah te pek an nih bakah raltlan leh khawtual mi chungkaw 241 ten hnenah serthlum leh Apple chinna pek niin ram acre 317.5 ah thlai te chin a ni.

Pu B.Lalchhanzova chuan Mizoramah Sawrkar leh NGO te thawh hona tha zawk neih a tul thu sawiin NGO te hmalakna chuan sorkar tha nasa taka a tih chak thu a sawi a. NGO lam pawh Sawrkar puih duhna rilru pu chunga department te nen thawh ho theihna kawng dap thiam zel turin a chah a ni.

He hunah hian, Horticulture Addl Director Pu L.Lalhmingmawia chuan thu sawiin thingtlang khaw hrang hranga Impulse NGO Network leh Mizorama an state Partner Cod Nerc te sawrkar department nen tangkawpa an hmalakna avangin thingtlang loneituten thlai thar tam tak an thar chhuah bakah an hralh thei chu lawmawm a tih thu a sawi.

<><><>

DELHI

Delhi Assembly inthlan campaign chuan a vanglai a thlengchho mek a. Vawiin akhan Prime Minister leh BJP hruaitu senior Narendra Modia te, Congress hruaitu Rahul Gandhi leh Aam Aadmi Party Convener Arvind Kejriwal te chu vawiin khan khawpui chhung hmun hrang hrangah an campaign a.

Prime Minister Modia chuan vawiin vek khan Mera Booth Sabse Majboot programme hnuaiiah BJP booth level worker te a kawm a. AAP chu na taka beiin inthlanah an chak dawn loh avangin nitin mipuite thil thar an tiam a ni a ti a. BJP worker te chu AAP diklohna hailang tur leh BJP intiamna te thehlar zel turin a chah a ni.

Congress hruaitu Rahul Gandhi chuan vawiin khan Sadar Bazar-ah thu a sawi a. Aam Aadmi Party hruaitu leh Punjab CM Bhagwant Maan chuan khawpui chhungah kanwgzawh a huaihawt bawk a ni.

<><><>

RAW JUTE

Sawrkar laipui chuan Jute sawngbawl loh hralhna Minimum Support Price chu kum 2025-26 chhungin tihpun a remti. Vawiina New Delhi-a chanchinbumite kawmin Union Commerce and Industry Minister Piyush Goyal chuan Union Cabinet chuan MSP hi tihsan a rel a ti a. Raw jute quintal khatah Rs.5650 MSP siam a ni a ti a. Hei hi nikum aiin cheng 515 in a sang a ti a. He thutlukna avang hian loneitu chhungkaw nuai 40 chuangin a hlawkna an tel dawn a ni a ti bawk.

Hei bakah hian Union Cabinet chuan National Health Mission chungchang an thlirho a ti a. Ahmaa an lo rel tawh angin kum hnih dang atan National Health Mission hi la kalpui chhunzawm an remti a ti a. Kum 2021 khan Union Cabinet chuan National Health Mission hi kum 2026 thlenga kalpui a lo rel tawh a ni.

<><><>

BBBP

Prime Minsiter Narendra Modia chuan Beti Bachao Beti Padhao chu nunphung siam danglam a,mipuite theihna hmanga hmalakna ropui tak a nih thu a sawi. Vawiina Beti Bachao Beti Padhao kum 10 tlinna puala social media-a a thudahah he thu hi tarlangin Pu Modia chuan he beihpui thlaknaah hian kil

tin atangin mipui an tel a ti a. Mipa leh hmeichhe inkar inthlahna zau tak awm thin titem turin Beti Bachao Beti Padhao hi hmanrua tan hman a ni a ti a. Hmeichhe naupangten zirna tha an dawn a, an beisei tihhlawhtlin anih theih nan tangkai taka hman a ni a ti bawk.

Prime Minister chuan naupanga mipa leh hmeichhia tam lam inthlah nasatna district-ah te hmasawna a awm mek a ti a. Mipuite leh pawl hrang hrang thawrimna avangin heng mellung pawimawh tak tak hi phun a ni a ti a. Pu Modia chaun mitinin mahni fanu te chanvo hum sak a, zirna tha leh thliarhranna awm lo vantlang nun siam theuh turin a chah a ni.

<><><>